

ACORDO DE DESENVOLVEMENTO DAS FESTAS DOS PATRÓNS DOS CENTROS

Motivación

Algunhas das festas universitarias coincidentes cos patróns dos centros sufriron nos últimos anos unha transformación debido fundamentalmente a dous factores: dunha banda o desprazamento desde o seu lugar propio (o recinto do centro) cara a espazos universitarios comúns, en particular a Cidade Universitaria do campus de Lagoas-Marcosende. Doutro lado, un novo modo de lecer e relacións sociais entre a xuventude, o denominado “botellón”, ten absorbido outros modos tradicionais de festa.

Algúns representantes do estudantado, conscientes de que estes cambios levan aparellada unha perda do carácter universitario da festa e un descenso do protagonismo dos e das estudantes que a promoven, teñen solicitado expresamente un xiro no plantexamento da organización destas festas patronais.

Máis concretamente, na sesión de Consello de Goberno do 10 de marzo de 2009 un representante do alumnado solicitou que se promovese unha reunión de estudantes co obxectivo de fixar uns criterios xerais para o desenvolvemento das festas dos patróns.

Esa reunión tivo lugar o 27 de marzo de 2009 e deu como resultado as pautas que se explicitan na presente normativa.

Ámbito de aplicación

Todos os centros do campus de Vigo que celebran unha festa patronal

1. As festas dos patróns de cada centro serán promovidas polas Delegacións de Estudantes, en colaboración coa respectiva dirección ou decanato do centro e a vicerreitoría que teña as competencias de Estudantes.
2. As festas dos patróns non terán carácter lucrativo, e en calquera caso, diferenciaranse das iniciativas de recadación de fondos para viaxes de paso de ecuador ou de fin de carreira.
3. Co fin de recuperar o perfil e o espírito universitario das festas dos patróns, potenciaranse as actividades científicas, divulgativas e institucionais, en colaboración coas direccións dos centros, e as deportivas e lúdicas, en colaboración coa Vicerreitoría de Extensión Cultural e Estudantes
4. As festas dos patróns non se desenvolverán na praza da Miralles. As actividades científicas, divulgativas e institucionais, así como tamén as lúdicas ou festivas celebraranse no recinto do centro, no lugar máis axeitado das súas instalacións segundo os obxectivos da organización e o criterio do equipo directivo. Para as actividades deportivas deberán facerse as oportunas reservas de instalacións no Servizo de Deportes.
5. Para a realización das festas evítaranse os venres e as vísperas de festivo.
6. Procurarase que, na medida do posible, as actividades das festas dos patróns non se alonguen máis aló das 20:00 h dentro dos campus da Universidade de Vigo.

Procedemento

As delegacións de alumnado poranse en contacto coa vicerreitoría con competencias en Estudantes antes da celebración con tempo suficiente, que será como mínimo de 3 semanas (15 días lectivos), para deseñar e atender as demandas que estas teñan, en particular naqueles aspectos que requiran unha loxística difícil de alcanzar só polos representantes de estudantes, como a seguridade privada, acondicionamento do lugar de celebración das actividades, etc.

A Universidade de Vigo, a través da vicerreitoría con competencias en Estudantes, prestará a axuda loxística necesaria para garantir o éxito da festa en aspectos como a seguridade, a limpeza e a hixiene. Tamén se compromete a intermediar coa dirección do centro en caso de conflito pola obtención do permiso para levar a cabo a festa.